

23/02/2000

LKIM buat promosi agropelancongan

KUALA LUMPUR, Selasa - Lembaga Kemajuan Ikan Malaysia (LKIM) cawangan Melaka-Negeri Sembilan mempromosikan industri agropelancongan di Festival Pelancongan Melaka 2000 yang berlangsung di Persiaran Kuala Lumpur City Centre (KLCC) di sini.

Pegawai LKIM, Zainal Abidin Hassan berkata, kegiatan pelancongan berasaskan pertanian anjuran badan itu mampu mendekatkan pelancong kepada alam semula jadi selain aktiviti berkaitan seperti menangkap ikan.

Selain itu, katanya, pelancong berpeluang menyusuri sungai, memancing dan melawat perkampungan nelayan dan kawasan paya bakau.

"Pengunjung juga boleh melawat kilang membuat cencaluk dan belacan di Kampung Batang Tiga, Tanjung Keling, dan kawasan penternakan kerang, kupang, udang harimau dan udang jenis Red Claw," katanya di festival itu hari ini.

Katanya, pelancong yang menyusuri sungai bermula di Jeti Parameswara berpeluang melihat pemandangan Bandar Melaka selain mengunjungi kawasan paya bakau dan sangkar penternakan siakap dan tilapia merah di Jeti Kuala Linggi.

Pengunjung juga berkesempatan membeli barangan kraftangan yang dihasilkan keluarga nelayan di 13 pulau sepanjang perairan Melaka.

LKIM turut mempunyai 17 chalet di Kilometer 43, Kuala Sungai Baru, Melaka yang menyediakan kemudahan berkayak, karaoke dan sukaneka kepada pengunjung.

Festival yang berlangsung dari 18 hingga 23 Februari dirasmikan pada 19 Februari lalu oleh Perdana Menteri Datuk Seri Dr Mahathir Mohamad.

Acara cabutan bertuah yang menawarkan Motosikal Kriss Modenas, Keahlian Kelab Golf Pusat Peranginan A'Famosa dan Hamper sebagai hadiah akan diadakan hari ini.

(END)